



Inatsisartunut ilaasortaq, Jens-Frederik Nielsen, Demokraatit

**Uranimut inatsisip malitsigisaanik taarsiivigineqarnissamik
piumasaqaateqartoqarsinnaanera pillugu § 37 naapertorlugu apeqquteqaammut 056 2022-
mut akissut**

Uranimut inatsisip malitsigisaanik taarsiivigineqarnissamut piumasaqaateqartoqarsinnaanera
pillugu apeqqutit matuma kinguliani allassimasut Inatsisartut suleriaasianni § 37, imm. 1
naapertorlugu Naalakkersuisunut saqqummiuppatit.

21-03-2022
Suliap nr. 2022 - 6123

Postboks 930
3900 Nuuk
Tlf. (+299) 34 68 00
Fax (+299) 43 02
E-mail: asn@nanoq.gl
www.naalakkersuisut.gl

**EM2021/23 (Uranisiunnginnissaq) suliarineqarnerani Inuusutissarsiornermut
Aatsitassanullu ataatsimiitsitaliaq apeqquteqaataanni 20. oktober ullulernerqarsimasuni
Naalakkersuisut akissuteqaammuni, ukioq taanna 8. oktober 2021 avataaniit inatsisitigut
naliliisimanernik eqqartuussisulerisoq (Eqqartuussissuserisut suliffeqarfiat) Poul Schmith-
miit tigusaqarsimanermikk eqqaasaqarsimangillat. Tamanna tunngavigalugu uani uku
paserusupakka:**

- 1. Pingasoriarluni (UKA 20221/23 Ataatsimiitsitaliap isumaliutissiissutaani ilanngussaq
A apeqqummi 5,6 aamma 7) Inuusutissarsiornermut Aatsitassanullu
ataatsimiitsitaliaq Naalakkersuisut inatsisitigut naliliisitsisimanersoq aperivaat.
Ataasiarluniluunniit Naalakkersuisut sioqqutitsiarlugu (8. Oktober)
eqqartuussisulerisumiit (Eqqartuussissuserisut suliffeqarfiat) Poul Schmith-miit
inatsisitigut naliliisimanernik tigusaqarsimaneq eqqaanngilaat. Suna peqqutigalugu
paasissutissat Inatsisartunut aalajangikkamik nipangiussimaneqarsimappat?**

Akissut:

Aallarniutigalugu erseqqissassavara Inatsisartuniit paasissutissanik
nipangiussisoqanngimmat, aammalu taamatut saqqummiineq sakkortuumik
akuerinngilara.

Uranimik il.il. misissueqqaarnissamut, aatsitassarsiorluni misissuinissamut aamma
piaanissamut inatsisissatut siunnersuut 2021-mi ukiaanerani ataatsimiinnermi
Inatsisartuni sukumiisumik suliarineqarpoq. Inatsisartut suliarinninnerannut atatillugu
Inuusutissarsiornermut Aatsitassanullu Ataatsimiititaliaq arlalinnik apeqquteqarpoq,
tamarmik akissuteqarfigineqartunik. Akissuteqaat aappassaanneerinnermi

ataatsimiititaliap isumaliutissiisutaanut ilanngunneqarpoq aammalu Inatsisartut nittartagaanni pissarsiarineqarsinnaalluni.

Ataatsimiititaliaq ulloq 11. oktober 2021-mi arlalinnik apeqquteqarpoq, tassanilu apeqquutit pingasut sammineruatit. Apeqquutit taakkunungalu akissutit ataani issuarneqarput:

"Apeqquut 5:

Piomasagaatinut apeqqummi 4-mi taaneqartunut atatillugu piiaanissamik akuersissuteqannginnermik nalunaaruteqarnerup arsaarinninnertut isigineqarsinnaanera Naalakkersuisunit inatsisilerinikkut nalilersorneqarsimava?

Akissut:

Siunnersuut taarsiissutitalimmik arsaarinnissuteqarnermut inatsisaanngilaq, taamaattumillu pigisanut pisinnaatitaaffinnik illersugaasunik taarsiissutitalimmik arsaarinnissuteqartarnermut inatsimmi tunngavissaliinani. Taamaalilluni tamanna inatsimmi tunngaviusumi § 73-imi pigisani illersugaasuni taarsiissutitalimmik arsaarinninnertut akuliunnerunersoq ataasiakkaatigut naliliisoqarpat, akuersissummi itigartitsisoqarsinnaanngilaq imaluunniit akuersissut annikillisinneqarsinnaanani imaluunniit uterteqquneqarsinnaanani. Aamma aatsitassanut ikummatissanullu inatsit atuuttoq malillugu akuersissutitut ittunik pigisanut pisinnaatitaaffiit illersugaasut taarsiissutitalimmik arsaarinnissutigineqarnissaannut periarfissaqanngilaq.

Atugassarititaasut apeqqut 4-mi taaneqartut naapertorlugit piiaanissamut akuersissummut itigartitsineq taarsiissutitalimmik arsaarinninnertut isigineqarsinnaassanersoq, ataasiakkaatigut naliliiffigineqassaaq, pisut arlalippassuit apeqqutaasussaallutik, aammalu Naalakkersuisut suliami aalajangersimasumi aalajangiinerannut atatillugu pisussaalluni. Suliami aalajangersimasumi naliliisoqarpoq itigartitsineq taarsiissutitalimmik arsaarinninnertut akuliunnerusoq, Naalakkersuisut inatsit tunngavigalugu itigartitsinnaassanngillat, tassami siunnersuut taarsiissutitalimmik arsaarinnissuteqarnissamut inatsimmi tunngavissaliinngimmat.

Apeqquut 6:

Suliniutinut ingerlasunut uranitalinnut atatillugu uranimik piiaanissamut nalinginnaasumik inerteqquteqarneq arsaarinninnertut isigineqarsinnaanersoq Naalakkersuisunit inatsisilerinikkut nalilersorneqarsimava?

Akissut:

Siunnersuut taarsiissutitalimmik arsaarinnissuteqarnermut inatsisaanngilaq, taamaattumillu pigisanut pisinnaatitaaffinnik illersugaasunik taarsiissutitalimmik arsaarinnissuteqartarnermut inatsimmi tunngavissaliinani. Taamaalilluni tamanna inatsimmi tunngaviusumi § 73-imi pigisani illersugaasuni taarsiissutitalimmik arsaarinninnertut akuliunnerunersoq ataasiakkaatigut naliliisoqarpat, akuersissummi itigartitsisoqarsinnaanngilaq imaluunniit akuersissut annikillisinneqarsinnaanani imaluunniit uterteqquneqarsinnaanani.

Taamaattumik Naalakkersuisut naliliinngillat uranimik piiaanissamut ataatsimut isigalugu inerteqquteqarnerup atuutsinneqalenera taarsiissutitalimmik arsaarinnissuteqarnertut isigineqarsinnaassasoq. Tassunga atatillugu oqaatigineqassaaq, siunnersuut akuersissutinut tunniunneqareersunut atuutinngimmat, kisianni taamaattoq assersuutigalugu piiaanissamut akuersissutinut inatsisip atuutilereernerata kingorna aatsitassarsiorluni misissuinissamut akuersissummut, inatsisip atuutilinnginnerani tunniunneqarsimasumut, nangissutigalugu tunniunneqartunut atuulluni.

Apeqqut 7:

Apeqqut 5 aamma 6 naapertorlugit naliliinerit takutippassuk arsaarinninneq pineqarsinnaasoq Namminersorlutik Oqartussat taarsissuteqarnissaannik piumasaqaateqartoqarsinnaanera Naalakkersuisunit inatsisilerinikkut nalilersorneqarsimava? Tamatuma saniatigut taarsissuteqarnissamik piumasaqaataajunnartut qanoq annertutiginnissaat Naalakkersuisunit nalilerneqarsimava?

Akissut:

Siullermik oqaatigineqarsinnaavoq pisinnaatitsissummik pigisaqartunut, suliassat inerteqquteqarnermik aaqqissuussinnermit sunnerneqarsimasinnaasunut, taarsiinermik tunniussinissamut imaluunniit allatut taarsiissuteqarnissamut siunnersuummi inatsimmi tunngavissamik aalajangersaasoqanngimmat. Taamaattoq pisinnaatitsissummik pigisaqartut allanik tunngavilimmik taarsiivigineqarnissaminut imaluunniit allatut taarsiisoqarnissaanut Namminersorlutik Oqartussat suliakkiullugit suliakkiisinnaasut mattunneqarsinnaanngilaq.

Apeqqut 5 innersuussutigalugu oqaatigeqqinneqassaaq, siunnersuut taarsiissutitalimmik arsaarinninnermut inatsisaanngimmat, taamaattumillu itigartitsineq taarsiissutitalimmik arsaarinnissutaasussaasoq naliliisoqarpat. piiaanissamut akuersissutit itigartinneqarsinnaasussaanaatik. Taamaattumik Naalakkersuisut naliliippata tamanna taarsiissutitalimmik arsaarinnissutaatinngagu itigartitsisoqarsinnaasoq, Naalakkersuisut piiaanissamut akuersissummik tunniussinissaq aatsaat itigartissinnaavaat.

Taamaattoq tassunga atatillugu pisinnaatitsissummik pigisaqartup itigartinneqartup Naalakkersuisut aalajangiinerannik eqqartuussivinnut suliakkiussisinaanera, tassungalu atatillugu itigartitsineq taarsiissutitalimmik arsaarinnissutaanerarlugu oqariartuuteqarnissaa, aamma mattunneqarsinnaanngilaq. Taamatut pisoqarnerani taarsiinissamut piunasaqaammut pisinnaatitsissummik pigisaqartoq aalajangersimasoq, suliaasaq aalajangersimasoq aammalu allatigut pisut arlalippassuit apeqqutaasussaapput.

Apeqqut 6 innersuussutigalugu oqaatigineqassaaq, Naalakkersuisut naliliinerat malillugu siunnersuutip akuerineqarnera imminermi taarsiissutitalimmik arsaarinninnerusinnaanngitsoq. Taamaattumik aamma Naalakkersuisut naliliinngillat Namminersorlutik Oqartussat inatsisip akuerineqarnerata malitsigisaanik taarsiivigineqarnissamik piunasaqaateqarfigineqarsinnaasut.”

Apeqqutit taakkua apeqqutigineqarnissaat ullunik pingasunik sioqqullugu ulloq 8. oktober 2021 eqqartuussissuserisut suliffeqarfianit Poul Schmidt-imit inatsisilerinikkut avataaneersup nalilersuina tiguara. Pisinnaatitsissummik pigisaqartunut aalajangersimasunut marlunnut piiaanissamut akuersissummik qinnuteqaatit itigartinneqassappata, tamanna taarsiissutitalimmik arsaarinnissutaassanersoq nalilersuinerne sammineqarpoq. Taamaalluni nalilersuineq inatsisissatut siunnersuummut, Inatsisartuni suliarineqartumut, tunggassuteqanngilaq. 2021-imi Inatsisartunut qinersinissaq sioqqullugu, taamaallunilu inatsisissatut siunnersuutip suliarineqarnera imaluunniit saqqummiunneqarnera sioqquterujussuarlugu, nalilersuinerup inniminnerneqarsimaneranit tamanna tunggavilersorneqarpoq. Inatsisissatut siunnersuut taarsiissutitalimmik arsaarinninnermut inatsisaanngimmat, inatsisissatut siunnersuutip suliarineqarneranut tunggatillugu, avataaneersup inatsisitigut nalilersuina pingaaruteqanngitsoq, naliliisoqarpoq, aamma akissuteqaammut ataatsimiititaliamut akissutigineqartumut. Taamaattoq oqaatigineqassaaq eqqartuussissuserisut suliffeqarfianit Poul Schmidt uranimut inatsisip suliarineqarneranut ikiuummat. Taamaalluni ataatsimiititaliamiit apeqqutit pingasut eqqortumik akineqarput aammalu nipangiussisoqarani.

Aammattaaq oqaatigineqassaaq, eqqartuussissuserisut suliffeqarfianit Poul Schmidt-imit avataaneersup inatsisitigut nalilersuina pillugu ulloq 22. oktobari 2021 ataatsimiititaliami ataatsimiinnermi Inuussutissarsiornermut Aatsitassanullu Ataatsimiititaliaq paasissutissinneqarmat. Ataatsimiititaliami ataatsimiinnermi Demokraatit siulittaasuut immikkut ittumik qaaqquneqarluni, naak pineqartoq ataatsimiititaliami ilaasortaannikkaluartoq. Atituumik akuutitsinissaq paasissutissanillu avitseqateqarnissaq qulakkeerniarlugu qaaqqusineq pivoq.

2. UKA2021/23 (uranisiunnginnissaq) suliarineqarnerani avataaniit inatsisitigut naliliisitsisimaneq soqutaanngitaanngitsutut Naalakkersuisut tungaanniit isumarineqarpa?

a. Tamanna isumarineqarpat piumasarissavara Naalakkersuisut tunngavilersueqqussavakka sooq taava suliaritinneqarsimanersoq

b. Tamanna isumarineqarpat piumasarissavara Naalakkersuisut nassuiaateqassasut sooq paasissutissaq Inatsisartunut nipangiussimassallugu aalajangersimaneeraat

Akissut:

Avataanit inatsisitigut naliliinermi suliaq 2021-mi Inatsisartunik qinersilinnginnermi aallartinneqarpoq, taamaammallu tamanna maanna Naalakkersuisunut attuumassuteqarani. Ilisimatinneqarpungali, avataanit naliliineq upernaakkut 2021-mi Greenland Mineralsip akuersissutaanut tunngatillugu pissutaasinnaasut pillugit allaffeqarfiup naliliineranit nassataasoq.

Tamatuma saniatigut apeqqut 1-imut akissut innersuussutigineqarpoq.

3. Naalakkersuisut isumaqarnerlutik paasissutissaq taanna avataaniit inatsisitigut naliliisitsisimaneq nipangiunneratigut Inatsisartut Inatsisaat § 6 nr.6 13. Maj 1993-meersoq Naalakkersuisunut ilaasortat akisussaanagerat pillugu unioqqutinneqarsimasoq?

a. Taamatut isumaqartoqarpat kissaatigaara paasissallugu Naalakkersuisut pineqartumut qanoq kinguneqartitsiniarnerisut

b. Tamanna isumarineqanngippat kissaatigaara paasissallugu, Inatsisartut oqaluuserisassamik oqaluuserinninneranni paasissutissanik oqaluuserisap inatsisartunit aalajangiiffigineqarnissaanut annertuumik pingaaruteqartunik sooq Naalakkersuisut tungaanniit pingaarutilittut isigineqannginnersut.

Akissut:

Akissuteqaat matuma siuliani allasimasoq innersuussutigalugu paasissutissanik nipangiussisoqarneraalluni saqqummiineq akueringilara.

Inatsisissatut siunnersuutip suliarineqarneranut atatillugu ataatsimiititaliap apeqqutai tamaasa Naalakkersuisut akissuteqarfigisimammatikkit. Tamatuma saniatigut akuutitsisoqarpoq, tassami partii sinniisoqanngimmat ataatsimiititaliap ataatsimiinnerani Demokraatit qaaqquneqarput. Tamatumani partiit tamarmik

ilisimasanik naligiimmik pissarsitinniarneqarput aammalu apeqquteqarnissamut
periarfissinneqarlutik.

Inussiarnersumik inuulluaqqusillunga


Naaja H. Nathanielsen